

聖

經進

皇宋中興四將傳卷之四

史官章穎纂

魏勝

魏勝者字彥威山東淮陽軍宿遷縣人也祖臯
父順皆為農勝少有勇力多智略善騎射好義
而疎於財一時輩流推服里中豪亦稱之縣募
弓箭手勝應募焉南北以淮為境即出鄉里來
歸居山陽每私踰淮入北境名行商實覘之也
亮篡立有南侵意聚島糧造器械簽諸路民為

兵勝躍曰此其時也慷慨奮發得義士三百餘人一旦北渡淮取漣水軍時紹興三十一年七月十五日也勝既得漣水宣朝廷德意不殺一人漣水民翕然以聽既定謀以其眾取海州海州之人跂足以望勝至郡守高文多渤海國人也文多聞勝起懼將及我遣兵來捕勝十六日勝至海州南八十里大伊遇虜兵勝率其眾迎戰走之勝追逐之迨夜直抵城下道路驚相傳水陸路悉有兵眾來城中人大恐文多閉城守

驅民上城備禦十七日旦勝令張旗幟城外山林間多舉煙火為疑兵遣人於諸城門說諭城中人以全虜棄信背盟起兵無名且以本朝寬大愛民之意告之自郡守之外皆吾舊民陷虜中餘三十年中心不忘德悉有向化歸順之意城上民開門勝即遣勇銳者登城門守禦餘皆自城門入莫有禦者獨高文多與其子安仁率牙兵以拒勝、整軍入城市肆不變秋毫無犯兵入與安仁父子戰於譙門內殺安仁及州

兵千餘人擒文多民皆安業如故勝推知州事
遣告諭諸縣胸山懷仁沐陽東海皆定乃蠲租
稅釋罪囚發倉庫犒戰士餘悉為軍儲以忠義
士分為五軍隊伍紀律肅於軍政指擣部分如
宿將勝自兼都統制即日揭示招募忠義士以
圖收復遠近聞之響應旬日得勝兵數千人勝
即具其事報境上郡白以聞 朝廷給軍裝器
甲時雖知亮將渝盟未發其端境此帥守監司
不敢以告也初勝未起時有老叟曰卜相於市

見有少年壯且勇者即妄以其術謂之曰當立
功名取封侯在旦暮間人聞其言與心契益信
之蓋倡義一助也勝既復海州連水軍復以乏
軍裝器甲未告欲乘此進討復中原地邊吏復
不肯以聞八月左軍統制董成謀出西北取沂
州勝先遣間還知虜兵數萬至沂以我軍器甲
未備戒成勿輕動成不從自以所部千餘人日
夜以進直入沂州巷戰其鋒不可當殺其守并
虜軍三千餘人餘皆奔潰不得出乃跪伏降民

厭左衽之俗皆驩迎問勞得軍器衣甲數萬虜
增生兵復集競登市人屋擲瓦以擊成軍成恐
傷士卒乃以所獲器甲芻糧悉焚之引軍奪門
出城士卒有出未及者成復入護之出出入城
門數回莫敢遏悉引士卒歸海州成不從勝言
幾敗勝欲斬之以其驍勇乃釋是月金國遣海
州同知蒙恬鎮國帥山東路軍馬萬餘人來攻
取海州至州之北二十里新橋勝親帥兵出城
迎敵勝觀城外地形道路險隘處設伏而以衣

甲全備者列陣以待之虜之以賞罰士卒皆效
死不顧用力鏖戰伏發賊大敗走殺蒙恬鎮國
斬首虜千餘人生降三百餘人獲旗鼓甲馬無
數軍聲益振山東之民皆欲歸附勝遣人持檄
招諭益結集壯少保山寨時出擊虜以待王師
之至共復中原沂州境蒼山有民生口數十萬
強壯萬餘人為山寨虜兵攻圍久寨首滕焜遣
人告急八月十八日勝以兵往救之二十一日
至山下陣虜潛伏軍倍多勝士卒遇伏皆赴山

寨虜兵襲之勝單騎在後與虜戰用大刀奮揮
擊之虜軍望見勝知其為將也以五百餘騎圍
勝數重勝陷其間四出突擊虜陣開復闔戰移
時身被七十創冒白刃出重圍中虜兵追之射
勝所乘馬仆勝步而出無有敢當者勝至山寨
虜又攻之急絕其水寨中人皆食乾炒米殺牛
馬飲血危困甚勝乃禱之神祇風雨大作人皆
得水以食虜軍攻山寨日急又周山為營固守
三日勝料虜兵且復攻取海州乃伺便出山寨

趨城中虜兵果來攻海州蒼山圍解二十八日
虜兵犯新橋九月一日抵城下勝出城迎敵皆
捷初三日虜兵分軍攻城四面勝以賞募士上
城守禦矢石如雨者七日虜兵死傷多遁去勝
嘗出城與虜戰鼻左中矢直透右下牙骨壞左
右上下七齒脫不可飲食未嘗在私舍日夕禦
戰皆親之勝起義久事無由徹聞於朝沿海制
置使李寶遣其子公佐由海道覘虜至海州勝
始因之以名聞且遣忠義將牛震使臣褚道詣

行在訖之都省朝廷始知勝之功時亮舉丘
踰淮慮勝在海州既其後乃分軍數萬人攻海
州十月初四日虜兵至新橋時李寶帥舟師往
密州膠西破虜舟艦至海州岸勝遣人邀之同
擊虜軍新橋大捷虜軍未退寶知虜舟動息復
以兵上船備禦海道亮初治舟艦欲分軍入平
江入錢塘悉以中原民操舟民家送衣裘相告
語俟王師至即背之寶以舟往至海島中適遇
北風盛舟不進寶望海岸有神祠禱之反風而

北虜舟不可進艤於岸望見寶舟操舟者設詐
謂虜兵俾皆入舟中寶舟遽至而虜兵不知也
縱火焚其舟以赤油絹為帆順風縱火藝之
操舟者皆登岸而走虜在舟中者坐以待縛也
獲其舟中皆楫車十數書姓名寶既捷於海
道勝亦以兵還海州於城北閔子門為捍禦計
十一日虜兵至城北三里砂卷為營列陣欲攻
閔門先遣人來謂勝令降勝開門出外諭之曰
亮叛盟失信無故起兵本朝以仁義之師來

復奮疆亮軍過淮必敗爾等宜識天時未歸必
獲爵賞使者來歸言之時虜兵已逼閔門勝上
閔門張樂飲酒犒軍士固守閔門勿令出戰虜
兵攻城踰時方少遣士出門憑險隘地擊虜兵
虜兵知不可攻乃以其軍轉而渡河襲閔後勝
知之即以兵入城虜軍襲其後而至勝慮士卒
為所追及乃獨乘馬逐虜兵叱之曰魏勝在此
聞之皆辟易士卒有後入者虜不敢復追勝軍
皆入城虜兵徑往城東欲過砂堰圍城為營勝

先已於砂堰設備拒之虜軍至夜不得過十二
日虜并兵來攻奪堰路拒戰終日終不能近有
新募士守河者不知兵虜遂過河勝怒絕我兵
歸路亟還軍入城虜兵果來追至東門外黃土
坡追且及勝以單騎逐之大聲叱之虜兵五百
餘騎皆望風退不敢近勝復追虜兵十數里士
皆得入城有不得入者自城南入西門虜兵復
自西南來襲勝軍勝從其後叱之虜兵大駭散
勝手殺十數人士卒悉入城守禦虜兵繞城為

營是日授勝修武郎閤門祇候差知海州兼山東路忠義軍都統遣其子昌同峒崕山首領張榮持旗榜往山東結約忠義虜兵自新橋関子門砂堰之敗殺傷者衆十四日黎明乘昏霧四面過壕攻城器械皆具攻益急勝激厲士卒竭力捍禦矢石交飛城上溶金汁投火牛虜兵不能前至巳時死傷多乃棄攻具拔寨走距海州為長垣包海在中州使不能出暨亮敗乃解兵方城守時城中器甲不備至紐鞋底為甲望

虜營炊煙起即出城驅之虜軍不得食勝善用大刀能左右射出以山東魏勝名姓揭之虜望見每退走勝乃為旗十數皆書勝姓名密以付諸將遇鏖戰時即揭之虜兵見悉退辟走是時太行山之東忠義之士蠶起開趙起於密州有衆十餘萬以助膠西之師王世隆起兵援海道夏俊取泗州來歸取京起濟南取兗州陳亨祖復陳州孟俊焚虜舟而守順昌李雄復鄧州而抗劉萼王友直復北京潼關以東淮水以北奮

起者不可殫紀凡能以姓名達者即加寵秩王世隆召見即日拜武功大夫賜金帶授御前諸軍統制取京由太行遣人以表至即拜檢校少保天平軍節度使未及拜命其徒張安國殺京時葛王雍已立大赦曰在山者為盜賊下山者為良民中原忠義所在保聚以待而往來議和使命相踵於道中原之民乃乘赦宥歸保田里故張安國貪虜重賞殺京其後張俊開督府嘗問孰能為我生致安國者王世隆應募願往俊

命以五百騎與之世隆辭焉止以其所部二十騎往時安國已受偽命知濟州世隆以一騎至濟州謁入安國駭曰世隆已南歸胡為至此使其人出視之曰貌瘠而赤鬚也果然出見之世隆拔刀劫之上馬出郊議事庭下莫敢動且曰王師十萬至矣及郊所隨騎每四三里則置一二騎盡二十騎而驅安國並馬而南矣督府以安國詣行在所下廷尉劾反覆狀初京以表進世隆安國俱列姓名矣安國服罪戮之都市

其後世隆為鎮江府都統制劉寶所惡有告其
謀叛者寶斬之是時中原忠義聳動傾嚮而視
時乘機先事而動莫如勝者方勝起義時無州
郡糧餉之給無府庫倉廩之儲勝經畫市易課
酒榷鹽勸糶豪右未嘗乏事環海州度既虜軍
攻取地築城垣開濠塹塞閑溢在軍未嘗一日
怠常如寇至故能以崛起之衆守瀕海之地無
戈甲之富而有禦敵之功勝亦自謂當胡馬南
牧之時其腹心之地空虛若得數萬人復結北

方忠義士共取中原不為難矣方糾集遠近犒
勞其衆會期有日十一月二十七日忽聞亮被
弒於維揚北師皆歸時開趙有十餘萬人攻城
陽軍矣虜師北歸王師南還山東響應之士輟
耕斂足旦暮以待進取遷延歲月往、罷歸初
亮聞海州魏勝之舉既未能取謂其人曰少頃
它時取之易耳亮殞北師未暇問海州勝亦得
以治軍旅人、皆為精銳金國嘗遣間探至海
州獲之犒之酒食厚賂遣還有自北方來歸者

與之同起處共飲食初無疑慮加振贍之使得
便安由是山東河北之人自遠來歸者衆每得
全國虛實悉以上聞勝所與忠義士共復海州
者第其勞能小大假授官資乃以告沿海制置
使李寶為言之朝悉如所欲補正官初無裁損
時出官四千餘人高下有差寶自十月二十七
日膠西破虜舟師還授節鉞復授京東路招討
使率海舟水陸進討紹興三十二年閏二月至
海州時全國遣山東路都總管以兵十萬人來

可下校增勝字

攻海州十三日至城北砂卷勝躬率士卒合寶
之軍與之戰大破之斬首虜不可計堰水為之
不流餘悉犇潰勝獨引所部士追犇二十里至
新橋又破之其不及踰橋而北者皆溺潮河中
死獲鞍馬旗鼓器甲不可計寶亦駐海州為進
取計四月全國遣五斤太史起諸路軍馬二十
餘萬人來攻海州先遣一軍自海州西南來斷
勝軍餉道十一日至州南四十里石闥堰勝擇
勇悍士三千餘騎當堰路力拒之終日虜軍不

能進至暮夜始還州南二十里石湫於橋堰險
隘處苗千人當之十二日虜兵十萬來奪隘路
勝率眾鏖戰殺其先鋒數千人餘皆走勝令勿
追止守橋堰要路遣人報招討李寶以防海
道上舡不復發兵虜兵盛來戰勝激勵其眾奮
力拒之自旦至暮虜兵不能奪勝乃令步卒整
隊前行勝自率騎卒殿後入城虜騎不敢踰橋
堰追躡勝既還及城下時百姓以李寶既上舡
懼虜兵大至皆挈老幼欲入城統制郭蔚閉城

門不得入人民牛馬蔽野號呼震動城中軍民
亦懼勝入城諭軍民以賊勢退怯之狀固守可
保無虞乃開城門縱之入城人眾多迨夜尚有
未能入者令入羊馬牆翼日乃入民皆安妥十
三日南北西路虜兵並至環城為營數重勝與
郭蔚分布諸兵上城備禦卧旗仆鼓軍民肅然
若無人虜軍驚疑數日不敢攻十七日乃分兵
騎植雲梯置破座攻城之器悉具四面合圍矢
石如雨注負土填濠水勝號令士卒俟其近城

然後鳴鼓張旗幟一時並舉發矢石及城外無
不中又以火牛金汁繼之凡三晝夜殺傷多虜
兵竟不能近城二十日罷攻修營壘絕河道欲
為固守計值天旱城中乏水勝禱之天時雨立
降軍食雖足馬糧草少乃勸誘富室致稻禾芻
芡皆有餘虜兵時出騎環城勝亦伺其不備掩
擊或獨出援之使不得休息當盛夏時被堅執
銳暴烈日中不得食戰則憊守則病以疾斃者
亦衆矣勝又聞夜發兵出城劫其營或焚燒攻

具皆捷五月初二日虜兵益增攻城并力攻城
尤急勝隨宜為防捍之具亦備且激勸士卒用
力固守十四日罷攻勝募士夜竊出告李寶以
攻圍之急寶以上聞還報城中以已命張子蓋
率兵來解圍勝益犒士卒以待子蓋之至十五
日虜兵滋有退意亦知子蓋軍且至有大呼於
城外者曰我知尔大軍來也頃之子蓋先帥騎
軍至步卒猶在後也勝出城外與子蓋議戰事
且促其步軍至勝亦出軍城北砂卷與虜軍大

可下校
增勝字
不下校
增可字

戰斬首虜不可計疊屍盈野流血成川大軍蹀
血追之十數里獲馬數萬軍器戈甲不勝數餘
兵皆遁勝與子蓋議進討子蓋曰受詔解圍不
知其他子蓋軍既還城中軍民疑懼亦欲隨王
師出城勝親往道涂邀而諭之直至漣水軍不
絕乃與偕還復業寶屯楚州招邀計事時都督
張浚在建康亦招勝至詢以軍事勝轉武功大
夫閤門宣贊舍人差充山東路忠義軍都統制
兼鎮江府駐劄御前、軍統制仍知海州八月

初八日還海州招集軍民各俾安業未幾詔以
鎮江御前、軍同統制魏全來保守海州為進
取之計隆興元年二月督府差賈和仲充山東
河北路招撫使節制本路軍馬海州駐劄和仲
疾勝與議論不合引誘忠義軍使不安勝與之
辨是非和仲飾說誣勝督府感之三月二十三
日督府呼勝至鎮江府計事罷其職改差京東
路馬步軍副總管都督府統制專一訓練御前
諸軍馬軍建康所駐劄既而督府知和仲言誣

非實七月罷和仲復勝舊職七月十二日勝復
還海州仍遣鎮江御前後軍之兵屯海州代前
軍之兵還鎮江勝自是鎮撫一方軍民安靖每
聽民訟辨曲直民皆心服無日不訓練軍實而
申做之紀律嚴明常如寇至犒將士賑孤窮修
器械築城壘威聲遐邇遠近悅服距北界沂州
一百八十里接境纔八九十里無侵軼之虞農
不釋耒犬不夜吠朝廷知其治行屢賜金帶弓
矢戰袍束帶銀合茶葉隆興元年十月賜詔獎

諭未幾授忠州刺史勝暇日每與將佐出城度
其地勢便利或險要處為戰守之備海州城西
南壕外有山曰孤竹敵至則登山望城中虛實
立見故西南受敵最緊勝欲築重城圍孤山在
內軍民皆言不便勝料之已熟乃以利害諭之
勸率士卒於壕外夾壕岸上東南兩向築城直
上山巔環其山北一面城高三丈周匝二三里
遇有寇警則先遣士卒在山從羊馬墻通路為
槁過壕上山往來城中寇不為害又能護西南

城壁不使敵人得近其後民始以為便城之北
三里砂卷地形稍高每虜兵至必於是為營其
他皆低下湫溲不可為營壘勝亦築小城環其
地而城益固矣勝嘗以意創如意戰車數百兩
砲車弩車亦數十兩以備戰守車上為獸面木
牌小創十數條垂氈幕軟牌皆繪猛獸每車用
二人推行可蔽五十人行則為陣可載輜重器
甲不勞士卒止則為營掛搭即如城壘守閔隘
人馬不能近遇敵可以禦箭鏃臨敵列陣如意

車在陣外以旗蔽映弩車當陣門其上寘床子
十石力弩箭大如鑿一箭能射數人一發三箭
可數百步砲軍在陣中施火石砲亦二百步初
兩陣相近陣間發弓弩箭砲次近陣門突出刀
槍手交陣間出騎軍兩向掩擊得捷拔陣追襲
小却則入陣間稍憩士卒不疲進退俱利伺便
出擊臨時恐有拒遏亦預為解脫計嘗於夜習
之勿使人見之也以其製上之朝從之令從軍
依倣其式而多造焉久之南北和好成隆興二

年八月詔徹海州戍以勝知楚州餘職仍其舊
令以本州官吏所部軍馬赴新治二十六日在
城官民并忠義軍馬起行時起義者惟海州兵
民挈族偕歸者數萬人二十八日盡絕鎮江後
軍人騎相繼行二十九日勝離海州九月初三
日至楚州詔勝專一措置清河口同鎮江府諸
軍都統制淮東路招撫使劉寶并知高郵軍統
制劉敏措置盱眙軍楚州一帶時議和尚未堅
決虜兵乘我之懈以舟載器甲糗糧自清河出

欲侵邊勝覘知之以通判余執度攝州事而身
率忠義軍馬專在清河口拒遏時鎮江右軍建
康府水軍統制之駐清河口者寶令聽勝節制
十一月虜兵詐言欲運糧往泗州由清河口入
淮勝知其謀欲禦之寶戒以方議和不許北嚮
放一箭清河口山東之水出焉虜之糧餉器甲
得至於淮者此水也舊以木柵植焉所以禦之
也劉錡於此嘗沉其舟矣以木植水中而以兵
禦之矢石可及也是時所植之木虜人皆以舟

拔去之勝以寶之命不敢動虜舟得出初四日虜騎果軼境至勝率諸軍於淮陰縣拒之自郊至申勝負未決虜軍增生兵來勝與之力戰且遣人告急於寶、在楚州相距四十里金鼓之聲相聞寶堅謂方講和好豈有攻戰之事終不為發一兵戰終日矢盡救兵不至勝猶依土阜為陣謂士卒曰我當死於此得脫者歸以報天子令步卒前行騎在後且戰且退至淮陰縣之東十八里店戰陳間勝中箭墜馬而死勝在

海州屢挫虜兵虜方以重賞募獲勝者以金一兩易勝之肉一兩故是役也為勝甘心焉事聞詔贈勝寧國軍節度使諡忠壯仍俟事定更於戰沒處立廟且令有司刻木以歛就鎮江擇地而葬焉命以勝官與其子郊授武功大夫忠州刺史賜銀絹一千匹兩宅一區田百頃次子昌承信即勝死之日年四十五右武大夫果州團練使告命尚未拜也其後使命往還淮東始得其事之詳上聞之劉寶以不出兵救勝削兩鎮

節鉞沒入其家貲貶瓊州以死勝所糾集忠義
有為賈和仲陰誘撥在別屯及因出戍隔絕者
尚有五千餘人以入鎮江府屯駐前軍
論曰無必勝之兵有必勝之將虜自兀朮之後
未見其有善戰者何以言之勝以新集之衆無
器甲之兵總數千人而虜衆十數萬不能抗則
亦可見矣女真鐵騎世以鷲鳥擬之雖曰精兵
有策以禦之亦未有不敗者惟遇庸將弱卒而
後可以得志如勝者出焉虜已北矣况如錡如

飛如顯忠並時而同奮彼將何以當之哉山東
之人怫鬱于中久矣然未有先勝而動者自勝
倡之而後群豪響應勝亦勇於義者也勝死於
戰乃命其子以父之爵賜其家以在官之田墓
而藏之廟而祀之報亦不薄矣臣嘗一再至其
戰處徘徊顧視父老猶能言之問之留屯諸將
已有不取勝者則夫有功能之人雖不同時猶
忌嫉之况於寶乎



余向藏南渡十將傳元刊本中有闕葉
因借周丈香嚴所藏中興四將傳手
補其可補處繼為友人指名相索去
案頭無是書心殊快，今年於劉時
舉編中興通鑑頗校勘再三因思類于
此等書者莫如十將傳適書友以是
舊鈔四將傳來即收之惜中多闕文

香巖又化去不知前借之書可蹤跡吾
姑訪之得於伊令郎漱六之手遂
復手補之誠快事也幸事也原本
神韓之傳別令寫出儼之已卯秋

孟下漸四日復翁子識



書